

LA TRÀPPULA PE LE PECURE

Éva métà settèmbre, quanne na matina ddu' scàzzuóppele ricciaiuóle, Minghe e Rusarie, avènne n'idèa géniale: apprearà na trappula pe le pècure.

‘Šte ddu’ uagliune évene figlie de une de le tanta parzenaule che štèane a servizie de ciérte signure ‘é Prètacatièlle.

Minghe e Rusarie criscévene cummé anemalucce: a la scóla nn'évene fatte cchiù de la prima classe e ‘nsàpèane lègge e scrive. Évene ‘nalfàbéte. Tenèane na faccia néra néra ca parèane ddu’ afrecane ‘bbessenise. La famiglia lore eva numérosa: tenèane n'ate e tré frate e quatte sóre; in tutte nòve figlie e n'aute cetelille rént'a la panza de la mamma.

La fianchétta vattèa cuntinuàmente a ‘šte ddu’ uagliune, ca ‘nze putèane sazià ‘é pizze e menèstra.

A chille tiémpe ze usava ancora fa la tranzumanza de le pècure, de le vacche e de le crape da la Puglia a la muntagna d'éstate e a u cuntrarie de viérne. Da la fine ‘é marze e fine a tutte abbrile le bèštie saglivene chi ‘goppe Supine, chi ‘ngoppe Uardiarèggia, chi ‘ngoppe San Pole, chi ‘ngoppe Cantalupe e chi sagliva a Capracotta e all'aute paise ‘e chéll'aute muntagne. A settèmbre le bèštie riscegnèane abbasce a la chianura e ze fermavene a campijà da San Martine fine a tutte le paisce fuggiane.

Mó ‘šte ddu’ scàzzuóppele facènne la penzata de scavà ddu’ fuosse de nu pare ‘é mètre larghe e nu pare ‘é mètre funne; le cuprènne che le frasche e ce appujànne ‘ngoppe cèrte tòppe ‘é jèrva frésca, facènne mòde ca le pècure pascènne pascènne fenissere rént'a la trappula.

Le fuosse le facènne nu poche luntane da la massaria lore; le facènne affianche a u tratture che passa a la cuntrada Grimalda de Prètacatièlle.

Doppe nu pare ‘é juorne, appéna dope miézejuorne, arrevatte la grèggia de pècure ‘é ciérte pecurare de la Rocca (Roccamandolfi).

‘Nnante ive u mentóne e appriésse tutte le pècure accompagnate da ciérte cane ghianche de razza ‘bruzzése: chi ija ‘nnante, chi ija de fianche a la grèggia e chi arréte.

La prima parte de le pècure passatte affianche a la trappula e cuntinuate a campijà. A nu cèrte mumènte nu cane ze n'addunatte d'u fuosse e ze mettètte a ‘bbajà e subbete currènne l'aute cane ca facèane l'ira ‘é Ddi' attuorne a 'llu fuosse. N'atu cane éve calàte abbasce a la fòssa e cercave de fa resagli le pècure ‘ngoppe. Dént'a u fuosse évene carute na pècura e ddu' ciavarrèlle.

Le pasture ca ivene arréte, cumme sentènne le cane ‘uàlijà, subbete currènne che le fucile spianate.

Rènne na ‘uardate attuorne ma nne verènne a nisciune e accusì recacciànne le pècure ‘ngoppe.

Po' raccugliènne nu rame ‘é sambuche e ce mettènne ‘štu bigliètte: “ Chi à fatte ‘ssu zruvizie è n'assassine e se mò è perdunate, appriésse ‘nze la scampa.” Ce arretrattànne sottè na coccia ‘é mòrte che na crócia cumme a chélle che štanne štampate ‘mbacce a le pale de la luce.

Po' arrevanne vèrte Carlantine e ‘ncuntranne na cócchia ‘é carbuniére e raccontanne u fatte.

Le carbunière avènne pure suspètta a chélla famiglia, ma chille néganne e lore l'avvesanne ca se ze repetèa u fatte le purtavene dirèttamènte 'ngàlabbùsce, sènza capì raggione.

Però da quille juorne quanne le pasture passavene pe Prétacatièlle u tratture éva sèmpe presenziate da carbunière e uardie foréstale e de trappule 'nze ne mettènne cchiù.